

**Егемен Қазақстан**

# Жолдасбеков Мырзатай

## Елбасы және егемендік

Тұнғыш Президент күні



Ұзына бойы тарихымызда небір қиямет-қындықтарды басымыздан кешкен, сан рет қирап, сан рет бой түзеген, «тарихтың тағдырлы көші» дейтін ұзак жолда салтанатты да өмір сүрген, хандары алтын тақта да отырған, алтын сарайларда да тұрған, іргелес елдермен бейбіт өмір сүре де білген елміз.

Тауқыметті соншама көп кешкен, тағдыры аянышты, езіліп-жанышылған, жабығып жапа шеккен, тарығып зарыққан халық жер бетінде екеу болса, соның біреуі – қазақ.

Ресейге бодан болған үш ғасырда тарихымыз, ар-оқжданымыз табанға тапталды. Кеңпейіл, анқау қазақтың мал-жаны тәркіленіп, ашаршылыққа ұшырады. Өзгенің тарихын өзімізге теліп оқытты. Хандарымыз бен билеріміз, бектеріміз бен батырларымыз – әжуаға, келекеге, тарихымыз – саясаттың құралына, Алаш арыстары өз халқының жауына айналды. Сана, дәстүр күйреді. Халық жадынан айырылды. Ұлт ретінде жер бетінен жойылып кете жаздадық.

Ел ылаң, дүние топалаң болған, жылқы ыскырса – желдікі, айдаса жаудікі болып тұрған, қазақтың аузынан қақпак, басынан тоқпақ кетпеген, қылыш – қынабынан, қанжар қынынан суырылған, найза белдеуден шешілген, бес қаруын асынған, ат ұстінде күн көрген, аптада белін шешпеген, пыран киіп, пырақ мінген заман еді ол.

Даламызды да, өзімізді де көрмеген батыстың ғалымдары қазақты жер бетіндегі жабайы көшпелілердің қатарына қосты. Олар өркениеттің Шығыстан басталғандығын, Еуропа қалың үйқыда жатқанда бұл өнірде салтанатты өмір салты болғандығын біле тұра мойындағылары келмеді. Өркениеттің тұтас бір дәүірін жасаған ата-тегіміз – ғұндарды да, оның кесемі Еділ (Аттила) патшаны да, көк Тәнірі мен қара жердің ортасын түгел билеген, дүниенің төрт бүршін аузына қаратқан Қағанат қаһармандарын да жабайыға санады. Тұрк өркениетін ауыздарына да алғысы келмеді.

Зығырданыңды қайнататын, пұшайман қылып сергелденге салатын, досың түгілі жауыңда да тілемейтін осында қорлықты, сүмдықты басымыздан кешкен, тарихқа есесі кеткен елміз.

Осының бәрі есіне түскенде, тоз-тоз болып, бытырап, жер бетінен жойылып кетпей, Ұлы Даланың тұтастығын да сақтап, бұл заманға қалай жеткенбіз деп қайран боласың. Қалай айтқанда да, тарыққанда – жол, қамыққанда ақыл тапқан, елдіктің туын жықпаған, қалың елінің көшін бастаған Елтұтқалар қай заманда да қазақта аз болған жок:

Мөде, Бумын, Естеми, Елтерістей қагандар, Керей, Жәнібек, Қасым, Есім, Тәуке, Абылайдай хандар, Тонықөк, Қорқыт, Асанқайғы, Қазтуған, Шалқиіз, Үмбетей, Ақтанберді, Бұқардай абыз жыраулар, Майқы, Төле, Қазыбек, Әйтекедей кеменгер билер, Еділ, Құлтегін, Алпамыс, Қобыланды, Едіге, Қарасай, Қабанбай, Бөгенбай, Бердіқожа, Наурызбайдай даңқты батырлар елдігімізді де, кеңдігімізді де сақтап қалған асылдар еді.

Әсіресе қазақты ұлт қып үйыстырып, ел қылып қалыптастырыған Абылай хан мен Төле, Қазыбек, Әйтеке билердің жөні бөлек. Бұлар – басына бақ қонып, Қыдыр дарыған, көсілгенде – көсем, шешілгенде – шешен, қалың елдің қайғысын жұтып, қамын жеген, қара қылды қақ жарған, жұртына тірек, пана болған, ақылы дария кен болған, қараға да, ханға да тең болған, еліне сөзі ем болған, жұртына сөзі жөн болған, әділдігімен елді аузына қаратқан дала данышпандары еді, қазақ халқының төрт кеменгері, елдігіміздің төрт құбыласы – төрт тіреуі, билік пен шешендіктің жығылмайтын төрт туы еді.

Бүгінде іргелі ел болып отырғанымыз да әуелі сол әруақтардың арқасы.

Сол заманда Абылай, Төле, Қазыбек, Әйтекедей даналардың болғаны – қазақтың бағы еді, көз жасын құдайдың көргені, тілеуін бергені еді, дегенінің болғаны, көңілінің толғаны еді, басына бақтың қонғаны еді.

Не керек, қазақ оны да бағалай алмады. Бақ бағалағанның басында ғана тұратынын білмеді. Білгісі де келмедин. Бірін бірі тыңдай бермейтін, бірінің сөзін бірі ұққысы келе бермейтін, өздерін шетінен данышпан санайтын қазақ одан да сабақ алған жоқ. Төрт данадан кейін қазақ ырың-жырың; басынан бағы, астынан тағы ұшқан, дау-дамайы қозған, дәурені озған аса бір ауыр кезеңді кешті.

Кеңес империясы тұсында тарихымыз саясатқа айналды, өз арыстарын өз халқына жау қылды. Бірін біріне айдалап салды. Ел ішінде өштестік, алауыздық, жікшілдік өрттей қаулады. Жұрт кімнің дос, кімнің қас екенін біле алмай сергелденгे түсіп, дал болды. Ел іргесі сөгілді. Елге тұтқа болғандарын итжеккенге айдатты. Сөйтіп, өз жақсысын езі қорлады. Аңқау қазақ мұның да артының неге апарып соғатынын анғармады.

Кеңестік Социалистік Республикалар Одағы дейтүғын елде «Қазақтың» деп те, «Менің ана тілім – қазақ тілі» деп те айта алмадық, айтқызбады. Тіл де, дін де, тарих та, мәдениет те, салт-дәстүр де, әдет-ғұрып та, ата жолы да – бәрі де күйреді, мансұқ болды. Елдің еңсесі түсті. Қатыгездік, самарқаулық, жалқаулық, немқұрайдылық, жағымпаздық, екіжүзділік етек алды. Қебі өтірік күлді, жалған сөйлемді. Қазақтың ақылы мен санасын түгел абақтыға жапты. Қайсы бірі тұған жер, есken елді тастап кетуге мәжбүр болды. Қазақ халқының көсемдері мен игі жақсылары осылай әділетсіздіктің, қатыгездіктің құрбаны болды.

«Дәуір алмасып жатқанда өмір сүрме», дейді екен қытайлар. Бүгінгі ұрпақтың өмірі дәуір мен дәуір, ғасыр мен ғасыр алмасып, заман өзгеріп жатқан тұсқа тұра келді. Біз осы құнға арып-ашып, жадап-жүдеп, шаршап-шалдығып, талықсып, сендей соғылысып, тентек қойдай теңселіп, ақылымыздан, жадымыздан, санамыздан айырыла жаздал жеттік. Шыргалаң, азапты жолдардан оттік, азаттық жолға әрен жеттік.

Құдайға шүкір, Алла көз жасымызды көрді, тілегімізді берді, басымыздан бақ тайған, қан жылаған зар заманымыз артта қалып, жаңа дәуірдің, жаңа заманың есігін аштық.

Иә, тағдыр, заман солай болды. Егемендікке кеменгер үш би де, ұлы Абылай хан да, басын бейгеге тіккен баһадүрлер де жете алмады. Біз жеттік.

Сөйтіп көз алдымызда жер де, ел де, адам да, қоғам да, заман да демде өзгерді. Ел есін жиды, етегін жапты, еңсесін көтерді. Егемен Қазақстан мемлекеті көш түзеді. Ұлы көшті Н.Ә. Назарбаев бастады.

Н.Назарбаев ел тізгінің қолына алмағайып, аумалы-төкпелі, қын кезенде алды. Ел бірлігін егемендігіміздің туы етіп көтерді. Тарихтың да, тағдырдың да сынынан абыраймен етіп, халқын да қыл көпірден, жанып тұрған өрттен аман алып шықты.

Н.Назарбаев – тұп атасынан, арғы тегінен батырлық, шешендік үзілмеген тектілердің ұрпағы. Бабасы – еңсегей бойлы Есімханның туын ұстаған қолбасшы Қарасай

батыр, атасы – Назарбай би. Әкесі Әбіш пен анасы Әлжан Сұлтанын әулиеге түнеп жүріп Құдайдан тілеп алған.

Болашақ Президентті мен алғаш 1957 жылы көрген едім. Қаскелендеңі Абай атындағы қазақ орта мектебінде педпрактиканан өткенімде Нұрсұлтан оныңшы кластың окушысы еді. Жүзі жайнап, екі көзі оттай жаңып, жарқ-жүрк етіп, ай маңдайы жарқырап, бәйге атында тыптырып отыратын. Сол кездің өзінде-ак есімі елдің аузында болатын, жастардың көшін бастап жүретін.

Бесіктегі баланың бек боларын

кім біледі,

Қарындағы баланың хан

боларын кім біледі,-

дегендей, ол кезде Нұрсұлтанның Президент боларын кім болжады дейсіз. Бірақ жалында тұрған жігіттің тубі жарып шығатынын жүрт сезетін еді.

Елдің тілегімен, халқының қолдауымен Нұрсұлтан Назарбаев 1991 жылдың бірінші желтоқсанында Қазақстан Республикасының Тұнғыш Президенті болып сайланды. Мемлекет орнату, оны баянды ету қынның қыны еді. Осы жауапкершілікті қалың елдің ішінен суырылып шығып, мойнына алды, өз тағдырын елінің тағдырымен жалғады, сөйтіп халқының үзілген үмітін жалғады, шырағын жақты.

Егемендік алған жылдары даурығысып қалпағымызды аспанға лақтырып қуаныстық. Қуанған да, қорыққан да бір дегендей, есі шыққан ел не істерін білмей шеруге де шықты. Шеруге не үшін шыққандарын білген де жоқ.

Мен тәуелсіздіктің алдында, егемендіктің алғашқы жылдарында, аласапыран ызыққы кезенде, Н.Назарбаевтың ел үшін тұн үйқысын төрт бөлген мазасыз күндерінің, үйқысыз түндерінің күесі болған, жан тебіренісін де, күйзелісін де көрген, жанында болған, қолғабыс тигізген кісінің бірімін.

Елбасы үнемі халқына сеніп, халқына арқа сүйеп келеді. Президентті қолтығынан демеген де, демейтін де, қолдаған да, қолдайтын да – туған халқы.

Елбасы саясатының алтын арқауы, басты өзегі – ел бірлігі, елдің ынтымағы.

Мемлекет орнату үшін бізге ең алдымен ынтымақ, бірлік, елдің тыныштығы керек еді. Ырың-жырыңға жол бермеу керек еді. Осы жолдан Елбасы ешқашан тайған емес.

Одақ тарағаннан кейін бұрынғы одақтас республикалардың бәрі де дағдарысқа ұшырады. Қалыптасқан колхоз-совхоздар ыдырады, зауыт-фабрикалар күйреді, балабақшалар, мектептер, мәдениет ошақтары талан-таражға түсті, экономика құлдырады, ел күйзеліп, жүртты үрей биледі. Ауыл әбіржіп, жүрт қалжырап, зиялыштар жаутандап, жастар сандалып қалды, маскунемдік, нашақорлық, жезөкшелік, өзге де індеге етек алды.

Неше түрлі арандатушылар шықты, жүртты әбіржітті, іріткі салды. Елдің есі шықты. Шерулер көбейді. Түрлі қозғалыстар пайда болды. Адамның ақылына сыймайтын митингілер қаптады. Небір «шешендер» шықты суырылып, небір «қөсемдер» шықты көлбендей. Неше түрлі газеттер шыға бастады. Қыскасы, жүрт бетімен кетті. Солардың көбі жаңа ғана тәй-тәй басып, қаз-қаз тұрып, тілерсегі дірілдеп, құлагы қалқайып келе жатқан тәуелсіздікке демеу болудың орнына бөлеу болды, кесірін тигізді. Көбінің аузынан ақ ит кіріп, көк ит шықты. Елді бүлікке де шақырды. Елбасын балағаттап та жатты. Сөйтіп жүріп «Демократия қайда?!», деп айқай салды. Осылай елдің де, ердің де тағдыры сынға түсті.

Жүрт еркімен жүрді, еркімен сөйледі, дегенін істеді. Бірақ демократия аузына келгендей оттау, ойына келгендей істеу емес екендігін, демократия дегеніміз интеллектуалды ақылдың билігі екендігін бәрі бірдей түсіне бермеді, түсінгілері де келмеді. Елбасы осының бәріне шыдады.

Жаңа қоғам, жаңа заман, жаңа адам келді. Ой-сана, тұрмыс-тіршілік өзгерді. Тарих, әдет-ғұрып, дәстүр қайта жаңғырды. Ел жаңарды, жер түледі. Мемлекеттілігіміз бекіді, баянды ішкі, сыртқы саясат орнықты. Назарбаев таққа мінген күннен бастап Қазақ атқа мінді.

Елордалы, Ақордалы, Елбасылы ел болдық. Осының бәрі де ынтымақ пен бірліктің арқасы еді. Елбасы үнемі елім деп еміреніп, не көрсе де елімен бірге көріп, бірге жасасып келеді.

Аумалы-төкпелі заманда біразымыз Елбасының жаңынан табылдық. Біздің басымызды жаңа мемлекет орнату идеясы біріктірді. Есі шыққан елге демеу болып, тізе қосып, жан аямай ұлтқа қызмет жасадық. Мұнымыздың уақыт үшін де, ұлт үшін де пайдасы аз болған жоқ. Ахуалдың орнығына, жас мемлекеттің іргесінің берік қалануына шама-шарқымызша осылай үлес қостық.

Мемлекет орнату, оны қалыптастыру, баянды ету, әлемге таныту дейтін құрделі процеске қатысады Алла кез келген кісінің пешенесіне жаза бермейді. Мен сол тұста бес жыл бойы мемлекетіміздің руханият саласын – идеологиясын басқардым. Халық, мемлекет алдындағы ауыр да жауапты міндетті абыраймен атқардым деп ойлаймын.

1991 жылдың 1 желтоқсанында Тұңғыш Президент сайлауын өткіздік. Сайлаудың штабын басқару да, Президенттің инаугурациясын – таққа отыру рәсімін өткізу де маған жүктелді. Мұны да абыраймен өткіздік. Оны қазақ халқы да, тарих та ұмытпайды деп ойлаймын.

2004 жылы Ақорданың ашылу салтанатында да қалың елді құттықтап, Елбасына бата беру – менің еншіме тиғен еді. Әбіш Кекілбаев, Ақселеу Сейдімбек үшеуіміз барып, халықтың атынан батаны мен берген едім. Мұны да тарих ұмытпайды деп сенемін.

«Сүйер ұлың болса, сен сүй» деп Абай айтқандай, Нұрсұлтан Назарбаев қолпаштауға да, қолдауға да, қошеметтеуге де тұратын, қалай мақтауға да сыйтын кісі, ортасынан ойы озған, қатарынан қалпы озған азамат.

Президент Назарбаев – халқын сан мың жылдар іздеген мұратына жеткізген, мемлекеттігімізді орнатып, оны дамытып, әлемге танытқан аса дарынды тұлға.

Нұрсұлтан Назарбаев – халқының бар қадір-қасиетін бойына жиган: тілін, тарихын, мәдениетін, әдет-ғұрпын, салт-дәстүрін жетік білетін, ұлтын жан-тәнімен сүйетін, халықтың үмітін, сенімін актап келе жатқан қалың елдің мұндасы, тағдырласы, елінің есіктегі басын төрге шығарған, әлемге кеңінен танылған, іргелі елдердің басшыларымен сөйлескенде сөзі асатын, егескенде еңсесін басатын, елдескенде мейірін шашатын аузы уәлі, сөзі дуалы саясаткер.

Нұрсұлтан Назарбаев – жүртты сендіре де, иландыра да алатын, өз елім менің – өзегім дейтін қайраткер, адамзат тарихын терең білетін, замана ағымын жіті ойлайтын, әлемнің озық тәжірибесін ұтымды пайдаланып, ата-бабадан қалған асыл өнегемен әдемі ұштастырып келе жатқан стратег, тәуелсіздік заманының бірнеше ұрпағын өсіріп келе жатқан тәлімгер, туған халқының Бәйтерегі, Қосемі, Кеменгери.

Көк түрктің кіндігінен жаралғандардың ішінен бүгінде озып тұғаны да – біздің Нұрсұлтан Назарбаев.

Біз ықылым замандардан бері Ұлы Даала төсінде сан қылышы тағдырды басынан кешкен, осы күнді армандаған ел едік. Сақ Ата дәуірінде де, Қағанат, Хандық заманында да, әз Жәнібектің, ер Абылайдың тұсында да еш ұрпақ мұншалықты бақытты, мұншалықты дәүлетті көрген жоқ. Арғы-бергі заманда Ұлы Даалада Назарбаевтай мемлекет орнатқан, жер жүзіне даңқы аскан тұлға туған жоқ.

Бүгінде әлем санасатын елге айналдық. Осының бәріне куә болып отырған, осындай елде өмір сүріп жатқан бәріміз де бақыттымыз.

Бір кезде жығылған Орданы қайта тігу, құлаған туды қайта тіктеу, елдің елінің ғана, ердің ерінің ғана қолынан келетін іс еді. Шүкір, бүгінде ынтымағы жарасқан, егеменді еліміз бар, құлан жортса тұяғы тозатын, қыран ұшса қанаты талатын ұлан-байтақ жеріміз бар, Абылайдың да аманатын орындаған еріміз бар. Елдің аты – Қазақстан, ердің аты – Нұрсұлтан. Қазақстан, Астана, Назарбаев бүгінде бір-бірінен бөлінбейтін тұтас ұғымға айналды.

Елбасының ендігі арманы – Ұлы Даалада Мәңгілік Ел орнату.

Ұлы Даңда Мәңгілік Ел орнату идеясы бүгін ғана тұа қалған жоқ, ықылым замандардан бері, ел орнап, билік пайда болғалы бері жалғасын үзбей келе жатқан арман, құллі адамзаттың асыл арманы. Адам баласы өмір бойы жұмақ жерді, жұмақ елді, бақытты, еркіндікті іздеумен, аңсаумен келеді. Ол – арман, татулығы жарасқан, береке-бірліктің елін орнатудың, Мәңгі Ел орнатудың идеясы. Назарбаев бұл идеяны халқының байырғыдан бері жалғасып келе жатқан байтақ тарихынан алып отыр. Ол – қой үстіне бозторғай жұмыртқалаған заман, Түрк дүниетанымындағы Өтүкен, халқымыз армандаған Жиделі Байсын, Асанқайғы желмаяға мініп шарқ ұрып іздеген Жерүйық, бақытты өмір, баянды тіршіліктің мекені. Қытайлар өзін Аспанасты еліміз дейді, Жапондар өздерін Күншығыс еліміз дейді, біз – Ұлы Даңаның Мәңгі Еліміз.

Арғы-бергі тарихта елім мәңгі болмасын деген бірде-бір мемлекет жоқ. Бәрі де соны армандаған. Бірақ жете алмаған. Бізге бүгінде елді адастырмайтын компас керек болып отыр, елдің ілгергі үміті керек болып отыр, арманға жетелейтін жарқын идея, құшті мемлекеттік идеология керек болып отыр. Бұл идеяны Н.Назарбаев елінің тәуелсіздігін қорғау үшін, егеменді Қазақстанды дамыту үшін, мындаған жылдар бойы бабалар қалыптастырған даналықты да, шешендікті де, көсемдікті де қайта жаңғыру үшін ұсынып отыр, бабалар жеткізе алмаған арманға елін жеткізсем деп ұсынып отыр.

Осындай Ұлы идеяны жүзеге асыру үшін алдымен ел ішінің тыныштығы, халықтың ынтымақ-бірлігі керек. Мұның бәрін жүзеге асыру, тәуелсіз қазақ елін көзінің қарашығындағы сақтау, ең озық елдердің қатарына қосу – бәріміздің де абыройлы міндетіміз.

Бізді сырттан келіп ешкім жарылқамайды, Жарылқаса Қазақты Қазақ ғана жарылқайды. Біз енді тәуелсіздігімізді сақтап қалу үшін, баянды ету үшін өмір сүруіміз керек. Ел қамы, халық тағдырына қатысты істерде пейішке де, тозаққа да бірге кіруге тиіспіз. Ұлы Даңа алдындағы жауапкершілік бізді бүгін осыған шақырып отыр. Тарихқа есесі кеткен халқымыздың тағдыры бізден осыны қажет етіп отыр.

Опық жесек, қорлық көрсек аңқаулығымыздан, ақкөңілділігімізден, сенгіштігімізден, алауыздығымыздан, жікшілдігімізден көрген елміз.

Бізге бүгін бәрінен де керегі – бабалар өсінет етіп кеткен ынтымақ пен бірлік.

Ынтымақ алдымен қазаққа керек. Біз ендігі жерде тоқсан тарау, қырық жілікке бөлінбей, тұтас ұлт болып ұйыса түсуіміз керек. Қазақ үш жүзге бөлінбейді, Үш жүзден құралады деп өмір сүруіміз керек. Бізге осы жарасады, қазақтың көсегесін осы көгерtedі. Бізді Мәңгі Елге осы апарады. Басқа жол жоқ.

Биыл тәуелсіздігімізге 26 жыл болады. Келесі жылы Астана 20 жасқа толады. Біз қуні кеше ғана өніміз түгілі түсімізге де кірмеген ғажайып қаланың төрінде отырмыз. Қиял-ғажайып ертегілері жете алмаған шындықты бастан кешіріп отырмыз.

Астана бүгінде құлашын көкке сермен, қанатын кең жайып, кешегі сақтар мен ғұндардың, байырғы түріктердің қарашаңырағы Дешті Қыпшақты, байтақ қазақ жерін қун өтіп, құн асқан сайын, ай өтіп, ай асқан сайын, жыл өтіп, жыл асқан сайын нұрландырып, туган еліміздің асқақ келбетіне, айбарына, егемендігіміздің символына айналды.

Тұңғыш Президент күні, Тәуелсіздік мейрамы, Астананың 20 жылдығы құтты болсын. Еліміз аман, жұрттың тыныш болсын.

Даламыз мыңғырған малды болсын,  
Жылқымыз жалды болсын,  
Жастарымыз қатарының алды болсын!  
Кигендерің – сәнді,  
Жегендерің -дәмді  
Жүріс-тұрыстарың – мәнді,  
Елдігіміз Мәңгі болсын!  
Тірегіміз де,  
Тілегіміз де,  
Жүргегіміз де бір болсын!